



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

TAPAK 10

TN CM-i PM Modi dang state nung train service memelatsü mepishi

Dutee Chand-i chiyongtsü talep 1000 lemstsü



VOL. XVII NO. 194 (ADOK 194) DIMAPUR

SANGTENNÜ (TUESDAY) MONUPII (MAY) 12, 2020

₹ 5.00

Odd-Even: Dimapur police-i gari 746 apu

Dimapur, May 11 (TYO): Dimapur district nung gari registration number odd aser even lemsar senzütsü tenzükba anogo nung police-i gari 746 apu aser sen lakh 1,41,050 senchi chiogo. Aibelenertem dang senchi achibaji sorkar senpongi aitsü.

"Tanü mezüing atema traffic inyakym tasen takok ngua tenzükogo. Iba inyakym atema tangatetba tajung nung onok den shisatsü aika lemsatepogo aser Dimapur nung traffic timtem ajema kümdaktsütsü atema

police-i meranga inyaktsü" ta Commissioner Police Dimapur, Rothihu Tetseo IPS-i osangbener dang ashi.

Iba ozüing tasen angateta public-i yaritepba atema kanga pelar aser maneni public-i ozüing amertem den amalitep alitsü ayongzüker, ta Tetseo-isa ashi.

Sorkar gari aika nüngdak mali ser nung senzüba nguogo, anungji sorkar mapa inyakertemia duty mapang masü dangbo mesenzütsü mepishir, ta Commissioner Police Dimapur-isa metetdaktsü.

School Education Department-i jangjashitsür

Dimapur, May 11 (TYO): Nagaland nung school ketdangser kar Tele/Radio Tutoring Programme atema ratatepba atema School Education Department Principal Director, Shanavas C, IAS-i iba dak sendakba osang kar jangjatsüogo.

April 29, 2020 nü DEOs, Sr. SDEOs and SDEOs dang District Administration den yaritepstsü aser kidang DD satellite telecast maliba kaketshirtem asoshi lenmang kar bushitsü tetuyuba agütsü. Parnok dang Village Hall, School Auditorium amala nung kaketshirtem nem angadaktsütsü/reprangdaktsütsü atema ashi, ta Shanavas C-i metetdaktsü.

Department-i school tem dang kaketshir ajak tesem ka nung adenshütsü mesüra class tenzüktsü atema tetuyuba kecha magütsü, ta paisa ashi.

Tele/Radio Tutoring Programme ya khen nung class ana dang agütsü atema sentong renema lir anungji, Schools/Village Council hall nung telecast asü dang kaketshir aika madenshütsü, ta Shanavas-isa ashi.

Department-isa 'Youtube' aser 'Facebook' nung Doordarshan telecast indang video tem sayur aser iba ya tsüraburtem/kaketshirtemi download sür reprangtsü akok, ta paisa shisem.

DALT-i sorkar dang tebilemstsü aika lemsateper

Dimapur, May 11 (TYO): Nagaland state sorkari tangalen anendaka alirtem anir arutsü merangba atema tenüngsang agütsür ta Dimapur Ao Lanur Telongjem (DALT)-i sangdong ka nung metetdaktsüogo.

Nagaland adena orr anendaka alir teimba ka kaketshirtem lir aser parnok kanga timtemdar. Ajisüaka, iba nung tebilemstsü ka lir kechiyong tangalen nungi arur teimba ka Dimapur ajanga arutsü aser yangi dang quarantine asütsü. Anungji state sorkari mapang tatsüka tsüingda nisung meyirjang aika quarantine asütsü asoshi koba tashi renema lir, ta DALT-isa sorkar dang asüingdangogo.

Social media sabang balala nung tangalen nungi arurtemji quarantine facility nung pei pei kini anepalutsü ta osang angazüker. Iba ya shitak süra, parnok anenzükdaktsüba aser chiyongtsü koma agütsütsü. Sorkari quarantine facility ajak nung nüngdakba infrastructure aser facility tem agütsütsüba aser senotsü endokba ajak sorkari agütsütsüba. Anungji, iba maparen nung metokmeperi aser ratatepba malitsü atema sorkari sentong tajung ka renemtsüba, ta DALT-isa metetdaktsü.

Külen, state sorkari Nagaland sasep nung district balala nung anendaka alirtem pei pei talidaki aotsü atema mapa inyakba asoshi

tebilemstsü abener. Telok aika dang pei sasa garitem anepalutsü ashir aser bus gari peria maliba ajanga tetsükdaktsü tulu ajurur, ta DALT-isa ashi.

Sorkari garitem bendena itemji telok balala nem para jenjang dalang agi agütsütsüba ta onoki tebilemba ka shidanger. Talisa, tangalen anendaka alirtem pei pei talidaki aotsü atema anogo peria agütsütsüba, ta DALT-isa metetdaktsü.

Tang ama tensa ka nung state sorkari tongti kin teloktem nem shilem agidaktsütsüba kangasa tongtipang lir. Ajisüaka, sorkari Naga teloktem jaoka shilem magidaktsüba angudang nemjema bilemer, ta parnokisa ashi.

Sendentem nung Non-Naga teloktem jaokba nung ashishitepba onük kecha mali saka Naga teloktem mejaokbaji tebilemstsü tulu ka lir. Talisa Naga Council Dimapur (NCD) ya tashi maliba telok ka lir kechiyong NCD ketdangpurtem kümsük tembangadoker asünung, ketdangpurtem ya achayangertem amai dang lir, ta DALT-isa metetdaktsüogo.

Naga teloktem yamaisa senzüka yutsüra Dimapur nung Ao Naga nungertemi state sorkar department/teloktem den amalitep kecha malitsüsa akümtsü, ta DALT-isa tebilemdangtsü olen ka ashi.

AKTD ajanga nisung 500 shi pei tasoli bushia yokogo



Sate nung anempongba ajanga Dimapur yimti nungi pei talidaki moteti alir nisung 500 jungnüa May 11, 2020 nü Mokokchung jila-i Ao Kaketshir Telongjem Dimapur-i achayanga yokogo. Hombarnü AKTD-i achayanga bus ter dak tema yokba mapang tangokba noksa ka yangi angur.

Dimapur, Monupii/May 11 (TYO): Alima ajanga sünga aliba COVID-19 tashidak wara nungi jenbua alitsü mechi state

sorkari Nagaland tesem ajungalen senzüsempogba lenmangtem shibanga yur pei talidak/district bushia moteti alir

nisung 500 shi May 11, 2020 nü Ao Kaketshir Telongjem Dimapur (AKTD) ajanga anepalua yokogo. Nüburtem, talisa kaketshir aser shikmentsü asoshi jila bushia arua lia iba tenokdangba agütsüba ajanga Aotsür-Aoer nisung 2,000 dak tema pei aliba district, Mokokchung-i moteti timtema aliba ajiteta, sorkari item amala nisungtem meyipa yoktsü asoshi anogo latettsüba nung ajemdaker AKTD-i achayanga parnok pei tasoli bushia yoka arudagi aser ano maneni yoktsü sentong lir.

(Maneni tapak 2 nung...)

CM temi Modi dang pei pei sasep nung inyaktsü ashi

New Delhi, May 11 (Agencies): Tanü linük nung Chief minister aikati Prime Minister Narendra Modi dang coronavirus tebilemstsü atema parnok nem shilem tuluba agidakjang ta shiogo.

Pei pei state tem sasep nung lockdown indang tetuyubatem onoki agütsütsüba kechiyong onokia ang onok state indang tensa tajungba meteta lir, ta tanü Prime Minister Narendra Modi-i Chief Minister tem den Video Conference alidang iba onük metetdaktsü.

Chief Minister tem rongnung Punjab, Kerala, West Bengal, Chhattisgarh aser Odisha CM temi iba onük atema kanga jembi liasü.

Külen, Telangana, Tamil Nadu aser Chhattisgarh chief minister temi Mongulbar nungi train services tenzükba magizüker ta metetdaktsü.

Centre-i iba telemtetba meyipa agütsüba kechiyong iba ajanga Covid-19 alirtemjangjaba, bendangba aser tendangba maparen inyakba nung timtem kanga ajurutsü, ta chief minister temi ashi.

Tanü senden nung West Bengal CM Mamata Banerjee-i mezüing jembidang "Centre-i coronavirus ya politics mapa inyaktsü atema tatemtsü ka ama amshir" ta tai tongloksü.

"Tang ya politics asayatsüba mapang ka masü, federal inyakym raksatsü temerang" ta

Mamata-i PM Modi dang ashi.

Ano, Tamil Nadu Chief Minister E Palanisamy-ia PM Modi dang tan ita flights aser trains mesenzükdaktsütsü atema ayongzüker.

Külen, Andhra Pradesh Chief Minister Jagan Mohan Reddy-ibo "tetuyuba kar agütsür agricultural markets, public transport, markets aser shopping malls lapoktsüba kechiyong iba ajanga rongsenkettsüing jenjang renloksü" ta ashi.

Iba sensaksem nung Defence Minister Rajnath Singh, Home Minister Amit Shah, Finance Minister Nirmala Sitharaman aser Health Minister Harsh Vardhan nungertem aden.

KDCC-i COVID-19 hospital & BSL-3 lab semdang

Kohima, May 11 (TYO): COVID-19 wara atema Nagaland aser talisa Kohima nung maparen renemba atema tebilemstsü bena Kohima District Congress Committee (KDCC)-i tanü COVID-19 Hospital aser Naga Hospital Authority Kohima nung Bio-Safety Laboratory (BSL-3 lab) yangluba semdanga liasü.

Iba mapang NHAK Managing Director Dr Thorhusie Katiry aser ENT Specialist Dr Kedozeo Punyü nati Congress lennirtem dang COVID-19 hospital indang osang metetdaktsü.

Tenati Personal Protection Equipments (PPEs), tebur aser tetsür atema ward, ICU with ventilators amala indang osang lemsatep. Temulung melemi

bilemba nisungtem indang sample Manipur kübok Imphal nung tendangtsü atema bener yoker, ta Dr Thorhusie aser Dr Kedozeo natisa ashi.

Sorkari agütsüba PPEs aser tanga osettem jenjang koma lir ta Congress lennirtemi asüingdang, sorkari osettsüset tajungtem dang agütsüogo ta ketdangsertemi langzü.

COVID-19 testing laboratory yangluba atema BSL-3 in-charge Dr Tina Khamo-i ashiba agi "iba lab tekakaba nung lapoktsü atema kanga meranga inyakdar."

"COVID-19 hospital nung maparen renema aliba ngua temulung asir aser state sorkar May 7, 2020 nü okadak dang

BSL-3 lab lateta aliba anogo nung renemtsü ta nangzükba ama mapa inyaktsü imlar" ta KDCC president Kevi Vizo-i ashi.

Iba mapang KDCC-isa NHAK ajanga COVID-19 anema mapa inyakba nung amshitsü atema senotsü teyari agütsü.

Tanü KDCC tir Kevi Vizo-i anir Nagaland Pradesh Congress Committee Working President i/c Kohima district, Khriedi Theünuo, taoba minister Seyiekuolie Kesiezie, Nagaland Pradesh Youth Congress president Vilhousielie Kengurise aser KDCC Mahila president Vilanuo nungertem liasü, ta KDCC press secretary Yangertemjen-i sangdong ka nung ashi.

Sample 848 negative putet; Sample 27 indang osang mangu

Dimapur, May 11 (TYO): Tanü nikongtsütsü 4:00 ako tashi nung Nagaland nungi sample 875 tendangtsü yokogo. Iba nungi sample 848 negative putetba osang nguogo aser sample 27 indang osang mangu lir, ta Principal Secretary Home, Abhijit Sinha-i ashi.

Tanü anüingdang 12:00 ako tashi nung tangalen anendaka alir nisung 18,282-i website iamstranded.nagaland.gov.in nung tenüing agütsüogo. Parnok ajak ya Nagaland-i meyip arutsü atema tenüing agütsü, ta Abhijit-

isa ashi.

Prime Minister-i tanü linük nung Chief Minister tem den Video Conference ka agi aser idangji COVID-19 tensa aser tarutsü atema teinyaktsütem indang onüktem lemsatep, ta paisa metetdaktsü.

Iba mapang Chief Minister-i Nagaland nung lockdown dak sendakba maparen inyakba, tangalen anendaka alirtem yariba aser state nung tangalen nungi aruba aayangertem yariba osangtem lemsatep.

Paisa inter-district

senzüsenbongba aser tangalen anendaka alirtem Nagaland-i meyipa anir arutsü atema mapa inyakba osang metetdaktsü.

Tangalen anendaka alirtem anir arutsü atema Special Train nüngdaker saka passenger train aser air services khen tatsüka sota atatsüba, ta Chief Minister-isa ashi.

Iba senden nung Chief Minister den Deputy Chief Minister, Planning & Coordination Minister, Chief Secretary aser tongti ketdangser aika aden.

(Maneni tapak 2 nung...)

Sorkari private school/college tem indang hostel mekazüksü



APC Nagaland Y.Kikheto Sema IAS den private colleges aser schools association tir aser Empowered committee Dimapur züngsemtem Commissioner indang Rest house Dimapur nung May 11 nü tangokba noksa nung angur.

Dimapur, Monupii/May 11 (TYO): Linük kübok tesem balala nungi nüburtem aika state-i meyipa arutsü asoshi jangraba osangzüükba sülen sorkari Dimapur district-i arurtem quarantine asütsü asoshi private school aser college tem indang hostel mekazüksü sentong yangludat.

Kidangi meyipa arurtem dak sendakba nung ken o balala sensak asemtsü asoshi Agriculture Production Commissioner, Nagaland, Y Kikheto Sema, shiba COVID-19 dak sendakba inyakyim ajak asoshi Dimapur district incharge lir, pa den Secretary, F&CS aser COVID-19, Dimapur, Core Committee Convenor, Honje Konyak nati achaayanga All Nagaland Private School Association, All Nagaland Private College Association aser DEO Dimapur den

Commissioner's Rest House, Dimapur nung May 11 nü senden ka ayongzüka menogo.

Senden nung APC-i sentepa aliba lokti dang tanga state nungi arurtem atema jenjang agibattem indang metetdaksü. Pai, nisung aika kidangi meyipa arutsü asoshi züngoksemdar aser Dimapur kija nunga nisung 8000 dak tema asütsü, anungji sorkari renemja aliba tesem nung parnok ajakbo masemtsü, ta ashi. Anungji pai private schools aser college tem dang sorkar nem teyari agüja parnok indang hostel tem quarantine centres ama amshitsü asoshi mepeshiba den tenügdakba tem ajak sorkari achaayangtsü ta tenangzüka agütsü.

Paisa, item nisungtem tonga aruba sülen temang kanga junga tendangtsü aser COVID-19 tashidak menar alitsü ta temulung meleme bilemba

nisungtem isolation ward tem nung ayutsü, ta ashi. COVID-19 anema ajak longjemer inyaksü asoshi yongzüka APC-i, private college hostel tem nung nisung 1500 nungi 2000 shi atema aser private school tem nung nisung 3500 nungi 4000 shi atema quarantine facilities renemtsütetsü imlar, ta metetdaksü aser iba dak sendakba nung association tir temi telangzüba tajung agütsüogo. Association kübok maliba school aser college tem dena core committee-i tongteprateptsü asoshi telemtetba agi.

Senden nung private schools aser colleges tir anaprongla core committee nung züngsem ama shim aser lokti tentet anaprongla nungi züngsem kaka accomodation committee züngsem asütsü shimogo.

May 10 nü anempongba nung aibelener nisung asem liasü

Dimapur, Monupii/May 11 (TYO): State Emergency Operation Centre Control Room on COVID-19, Government of Nagaland, Home Department ajanga May 10, 2020 nü state tesem ajungalen temzüng ozüng indang osang metetdaksü. Principal Secretary Home, Abhijit Sinha-i ashiba agi, anempongba aser curfew totuyuba nung nisung aseme aibelena liasü.

Mokokchung, Longleng aser Wokha dak alaka state nung aliba district ajak nung jang-otzü, aansotsü, mamatzü aser mozü ayokba dokangtem ajak lapoka liasü. Electricity, telecom

aser medical amala nügdakba maparen inyaksütem aser manufacturing unit aser nügdakba osettsüset aser e-commerce lemstüba garitem senzüsempongba nung tenokdangba magütsü.

COVID-19 tashidak wara mechi tenokdangba balala agüja aliba ajanga kongshia aliba bendanglen nungi arua mapa inyakeritem nem chiyongtsü aser anisüngzüksü ki agütsü. Relief camp pezü nung migrant labourer 61 lir aser chiyongtsü agütsüba camp pezü nungi anogoshi aayanger aser teyari nügdakba alirtem nem chiyongtsü aser dry ration agütsü, ta sangdong ajanga ashi.

MCD-i par nübur danga state nungi marui atatsü ajungshir

Dimapur, Monupii/May 11 (TYO): Muslim Council Dimapur (MCD) ajanga Muslim nunger danga state nungi Nagaland-i maruteti alirtem dang taruba ita ana tashi mesüra sorkari tensa junga kümogo ta mesangdong tashi marui atatsü ashi.

Muslim nungertem ajangzüksü aser talisa Nagaland nung aliba senso ajak taküm kümzüka alitsü mechi Muslim kintem lungjemer iba telemtetba ya agi, ta MCD working president Ahidur

Rahman-i ashi. State-i arünüaka maruteti alirtem nem council ajanga teyari agütsütsü merangtsü mesüra Nagaland sorkar dang yaritsü mepishitsü, kechiaser parnok timba MCD aser Jama Masjid committee balala nem state-i arutsü mulunga aliba metetdakja tenüng agüja lir, ta ashi.

Maneni district administration den lungjemer quarantine centre amenoktsü aliba maparen athir, ta sangdong ajanga ashi.

Imlibenla Wati-i Care and Support Children Home semdang



Dimapur, Monupii/May 11 (TYO): Alima ajunga nung mother day amungba anogo Miss Imlibenla Wati-i (Miss Nagaland 2012) Care and Support Children Home semdanga liasü.

Mother's Day (10.05.2020) nüngtem nung lai Care and Support Children Home, Tsumarshiyong, Mokokchung semdang. Children Home semdangba mapang lai tanurtem den sensak asem aser

tanurtem den mapang indoka liasü. La den külemi lai cake tulu ka, nanglong, amtsük, toilet needs amala tenügdakba oset balala bener arutsü. Laisa tanurtem dang ajemalua tashi angatsü aser takoker kaka akümtsü asoshi kaket shisatsü meranga bushitsü ajungshi. Laisa, Multiple Purpose Hall nung inoktsü asoshi ceiling Fan tenla agütsütsü nangzü.

Kasa mapang nung tanurtemia ken aser lai zünga

shilem agi aser Imlibenla Wati atema mejeta sarasademja liasü.

Care and Support Children Home temeim agi semdangba aser la mapa tajung asoshi ketdangsertemi Imlibenla Wati nem tenügsang agütsüba den la tarutsü wadangtem nung Tsüngremi la molamoshia moajang ta sarasademtsür, ta Care and Support Society Director cum Chief Functionary, Imchawati Kichu-i sangdong ka ajanga metetdaksü.

DC Dimapur-i osangkaket alemem den pelaba lemsatep

Dimapur, Monupii/May 11 (TYO): Nüburtem anogoshi osangkaket züngtettsüsa bendanga agütsür tenzüka atema Deputy Commissioner, Dimapur, Anoop Kinchi, IAS ajanga osangkaket alemem tem den pelaba lemsatep.

Parnoki mapa meranga inyakba atema tepela sayua Dimapur district administration ajanga osangkaket alemem nem May 11, 2020 nü The Morung Express office telungzü nung

teyari kar agüja liasü. Iba ama mapa tajung inyaka osangkaket alemertem ajungmesoba asoshi osangkaket alemertem tenüng nung Dimapur Press Club tir, Dilip Sharma-i Deputy Commissioner dang pelaba lemsatep. Iba teyari agütsüba sentong ya Dimapur Press Club, Nagaland Press Association aser DPRO office Dimapur ajanga achayanga agiba alitsü.

DC Kohima-i metetdaksür

Dimapur, Monupii/May 11 (TYO): Taoba mapang totuyuba agüja alibattem kar melenshia Deputy Commissioner, Kohima, Gregory Thejawelie NCS ajanga tang nungi inyakyonga aotsü asoshi totuyuba kar agütsü.

Taoba mapang totuyuba agütsüba nung shia aliba dokan tem koba melentepa lapoktsü tuyua liasü, item dokan ya mela

aliba mapang (anepdang 7:00 ako nungi nikongdang 2:00 ako) market days ajak (i.e. Hombar, Bodhbar, Hokulbar aser Honibar) nung lapoktsü.

Lenmang nung aliba Market Complexes indang tejakdang osettsüset ayoktsü melar, koba anepdang 7:00 ako nungi nikongdang 2:00 ako tashi Hombar, Bodhbar, Hokulbar aser Honibar anogotem lapoktsü.

AKTD ajanga nisung 500 shi pei tasoli...

(TAPAK 1 NUNGI...)

May 11, Hombarnü Dimapur jila nungi Mokokchung jila bushia bus 15 yokba nung bus ana district administration ajanga agütsü aser tanüngba bus 13 ya AKTD-i lenmang balala nungi bushiteta liasü. Item rongnung Hope Academy, Maple Tree School, Dimapur aser Deputy Commissioner of Police, Zone II, Aotula Imchen, IPS nungertem ajanga bus tenla. Kasa mapang DABA, Minister, Rural Development, Metsubo Jamir, MLA Imkong L. Imchen, MLA Moatoshi,

Jemti Mollier aser B. Toshi Aonok nungertemi senotsü tenla aser ano maneni Minister, Higher & Technical Education aser Tribal Affairs, Temjen Imna Along-i Mokokchung-i aor ajak asoshi Kohima nung chiyongtsü renemtsü, ta AKTD tir, Moayanger Jamir-i ashi.

Hombarnü tashibo district administration ajanga item bus ajunga nung totzü inoktsüogo aser sorkari anogo latetja aliba mapang tashi AKTD-i maneni iba maparen nung nüburtem den yariteptsü tebilemba aser

tejangraba lir, ta AKTD tir-isa ashi.

AKTD-i anepalua Mokokchung bushia yokba bus tem nungya Aotsür-Aoer kija masü, saka Mokokchung district kübok tesem balala nung alir kin balala densema tepdang makai yoker.

Ano maneni Dimapur yimti nungi Mokokchung-i moteti alirtemi AKTD office den mobile number 8837200339/7005461965 ajanga May 12, 2020 nikongdang 5:00 ako tashinung tongteprateptem nung ajangtsü, ta AKTD tir-isa ashi.

Sample 848 negative putet...

(TAPAK 1 NUNGI...)

Tanü Chief Minister-isa Kohima nung NBCC, Joint Christian Forum, APO, AWO, AYO aser ASU tanishirtem den senden ka amen.

Iba mapang linük ajunga shibangba ajanga tebilemba balala ajuruba onüktem lemsatep aser asen peritsüsa jangotsü aser chiyongtsütem anepalutsü atema mapa inyaksü tebilembatem lemsatep liasü.

Tia makai COVID-19 agi

shiranga asü nungbo, tashishitep kecha melii inyakyim shitak amshia leper nung remdaksütsüla ta asüba onük tanü senden nungsa benoka olemtep.

Iba senden nung Chief Minister den PWD (Housing & Mechanical) Minister, Urban Development & Municipal Affairs Advisor, MLA Khriehu Liezietsu, Chief Secretary aser tanga tongti ketdangsertem aden, ta Principal Secretary Home-isa metetdaksü.

Assam nung nisung 2 dak COVID19 putet



Assam Health and Family Welfare Minister Himanta Biswa Sarma-i Jorhat Medical College and Hospital (JMCH) nung yipden 50 aliba ICU ka lapoktsüba sülen hospital staff den jembiba noksa nung angur. (Jorhat, May 11)

Guwahati, May 11 (Agencies): Hombarnü Assam nung nisung ana dak COVID19 aliba putetogo aser tena züngsema nisung ajak agi 64 jungogo.

Guwahati nung nisung tasen ana dak COVID19 aliba putetogo, ta Assam health minister Himanta Biswa Sarma-i ashi.

Tena rongnung ka Morigaon district nungi lir aser ka

Guwahati nung alir, ta Sarma-isa ashi.

Hombarnü putetba nisung ana züngsema Assam nung tang nisung 29 tashi COVID19 agi shirangdar.

Taoba mapang COVID19 agi shiranger nisung 34 tashi mozü ki balala nung taneptsü ngur anizükogo. Assam nung iba tashidak agi nisung ka dang süogo.

Union home ministry

website ajanga ashiba agi, India nung nisung 67,152 dak COVID19 aliba puteta lir aser nisung 2,206 süogo.

Tang COVID19 agi shiranger 44,029 tashi lir aser nisung 20,916 tashi mozü ki balala nungi taneptsü ngur anizükogo.

Alima nung nisung million 4.12 dak COVID19 puteta lir aser iba tashidak agi nisung lakh 2.83 süogo.

Nakmati shibelenba anema NPP züngsem 8-i party toktsü

Shillong, May 11 (Agencies): Meghalaya nung National People's Party (NPP) züngsem 8-i party toktsüogo. Parnok rongnung taoba MLA Justine Dkhar dena lir.

Party nung public-i ajuruba khurettem lemsateptsü sabang kecha mali ta shia parnoki NPP nungi anen.

State sorkari East Jaiñtia Hills district nungi Assam-i nakmati shibelenba telemtetba agiba atema parnok sorkar dak tai tongloksü.

NPP toktsürtem rongnung, taoba mapang Jaiñtia Hills Autonomous District Council

züngsem asem- Thomas Red Zone Area nungi East Nongtdu, Joinriwell Pyrtuh aser Jaiñtia Hills district-i arudaktsür" Violet Lyngdoh nunger dena lir. ta parnokisa metetdaktsü.

Violet ya taoba Meghalaya BJP state president Shibun Lyngdoh tenu lir. "East Jaiñtia Hills district nung aliba cement plants atema district nung ali rongsen peria dang lir ta party-i kanga junga meteta lir, saka sorkari tekong meranger aser kulitem mangu ama yutsür" ta parnokisa ashi.

Taoba mapang, coal traders association aser transporters' association dena telok aikati East Jaiñtia Hills nung aliba cement company tem dangi Assam nungi nakmati bener aruba magizükba metetdaktsüogo.

"Nisungtemi COVID-19 wara anema kanga meranga rarar saka sorkar akümba party-i truck driver aser teyaritepertem State adener

Red Zone Area nungi East Jaiñtia Hills district-i arudaktsür" ta parnokisa metetdaktsü.

"East Jaiñtia Hills district nung aliba cement plants atema district nung ali rongsen peria dang lir ta party-i kanga junga meteta lir, saka sorkari tekong meranger aser kulitem mangu ama yutsür" ta parnokisa ashi.

Taoba mapang, coal traders association aser transporters' association dena telok aikati East Jaiñtia Hills nung aliba cement company tem dangi Assam nungi nakmati bener aruba magizükba metetdaktsüogo.

Mizoram nung COVID-19 lockdown mapang nisung 1,715 dang senchi achi

Aizawl, May 11 (Agencies): Deobarnü Mizoram Police-i ashiba agi, May 4, 2020 nü nungi tenzüka tanü tashi COVID-19 lockdown tetuyuba aser iba dak sendakba tanga ozüng nung aibelener nisung 1,715 dang senchi chiogo.

COVID-19 Ordinance, 2020 indang Containment aser Prevention ozüng amenokba sülen, iba ozüng anema aibelenba ajanga parnok dang senchi achi, ta Inspector-General of Police (Law and Order), LH Shanliana-i ashi.

Item aibelener dang nungi senchi sen lakh pezü dak tema sarutetogo, ta paisa ashi. Aibelenertem rongnung lokti aliba tesem nung mask meinoki senzürtem timba liasü, ta LH Shanlian-isa shisem.

Lunglei district sülen, COVID-19 ozüng anema aibelener timtibaji Aizawl district asütsü.

May 3, 2020 nü state sorkar ajanga sangdongba COVID-19 Ordinance 2020 indang Containment & Prevention nung, tim tekolakpur dang nungi temelaba magii nisung shibai coronavirus agi shirangertem indang tenüng social media sabang mesüra osang kaket nung adoktsüdir, ita asem atema tepuokdak ayutsü mesüra sen 5,000 senchi achitsü mesüra

temerenshi anaprongla agütsütsü, ta shia lir.

Iba dak alia, temelaba tejangja magii state arrtsü alema aoba mesüra aitba, mesüra lokti senden mesüra lokti tekülem ayongzükba mesüra quarantine facility nungi jena aoba atema sen 5,000 senchi achitsü ta tetuyuba nung agüja lir.

Lokti aliba tesem nung metzü metsüba atema sen 300, social distancing tetuyuba nung aibelenba atema sen 200 aser lokti aliba tesem nung mask meinokba atema sen 100 senchi acütsü.

Mapang shia lockdown dak sendakba ozüng tasen sangoktsüba densema Centre mesüra state sorkar ajanga agütsüba teyubatem aser temetetsütem nung manidakertem atema sen 1,000 senchi achitsü.

Kasa mapang, quarantine centre nung memongnertem mesüra jena aotsü merangertem dang sen 3,000 senchi alitsü.

Quarantine facility nung anepalua amongba mapang, tangar lendongi idaktsütsüsa timtem agütsürtem aser iba dak sendakba ozüng nung aibelenertem dang sen 500 senchi achitsü, ta state sorkarisa metetdaktsüogo.



Taoba Assam Chief Minister aser Congress lennir Tarun Gogoi-i Hombarnü Guwahati nung osangbener den jembidang agiba noksa ka angur. Tanü pai COVID-19 sülen rongsenkettsüng jenjang ajungkettsü aser aayangertem tebilemtsü koktettsü atema tebilemba kar lemsatop. (Guwahati, May 11)



Rajasthan nungi Tripura-i arurtem ISBT (Inter State Bus Terminal) nungi pei talidaki apusoa aodang agiba noksa angur. (Agartala, May 11, 2020)

Chennai nungi Manipur nunger ayamesogo

Imphal, May 11 (TYO): Manipur nunger pei pei talidak maruteti alir nisung 1,200 shi Deobar aonung 8:00 ako meta MGR Central Railway Station, Chennai nungi train tanabuba nung state-i arutsü atema ayamesoogo.

Chennai yimti kübok, tesem balala nungi item passenger ya MTC indang bus tem nung anidena iba railway station tongja liasü.

Chennai nung Manipur Association, Co-ordinator, Thomas Chapao-i ashiba agi, "Pei pei tesem mouteti alir passenger tenüng ajak Manipur aser Tamil Nadu sorkar naprongla den register süogo."

Item passenger pei state-i yoktsü atema Manipur sorkari

ajanga mepishiba dak sendakba nung Tamil Nadu sorkari train achaayangtsü. Passenger ishika iba train nung maruteti 'waiting list' nung atadar, ajisüaka, taruba train nung parnok ya senzüsebongdaktsütsü imlar, ta Thomas-i ashi.

Thomas-isa ashiba agi, Deobar aonung train nung arutsü passenger ka danga mezüdoki yokogo.

Taruba hopta tashi nung, sorkari train ana anepalutsütsü akok, aji asünung ang register süa alir passenger ajak Manipur state tonger sülen pei pei talidak otettsü, ta Thomas-isa shisem.

Deobar aonung Chennai nungi ayamesoa aoba train ya May 12, 2020 nü Manipur atongtsü.



TIR YIMYIM YIMOBILEM (EDITORIAL)

DIMAPUR SANGTENNÜ, MONUPII (MAY) 12, 2020

Ano kanga kümdangtsüla

Asenok ajaki akhi ama sademsadema pei onüleri oa pei inyaknüsü inyaka senzüner saka ano tangsa tekümdangba kümdanga alitsüba mapang ka agi asenok menepogo. Tang asenok yamai tashidak memenatepsü asoshi tsübuseta kidang mongteper, lokti sendena malir, kaketreju ajak shibanga lir aser kibong mesütsü asoshia mapai moutet timtem ajuruba akümlir tongpang ya kanga tulu, ajisüaka, iba tongpang nung asenoki tsübuba tsükchirji asen tenük agi mangur. Asenok atema shisabolutsü tulutibaji aji lir. Tsükchirji tenük agi ngua rarar asünungbo parnokji kodaser tepsettsü mesüra parnok nungi asenok kodaser jenbuttsü ta memelaa sentong atongtetla. Ajisüaka, tenük agibo mangur saka iba tashidak wara agi alima nung nisung lakh ana asem asüba angashir aser lakh metsü semer dak iba tashidak agi tonggogo ta angashiba den külemi tanübo joko Assam nungsa asüyonga asenok anasa Jorhat aser Golaghat tashi iba tashidak agi atongba angashir. Aji oda, wara agi Gauhati tongra iba kasa waraji Dimapur atongtsü melamelar aser Jorhat aser Golaghat tongra iba kasa waraji Mokochung-bo khen nung tonger alitsü, anungji aji meteta asenok ajak tangsa tekümdangba alitsü nungdaker. Iba denji ano ita junga kechalenia moudaktsüi state balala kübok yimti balala nung nisungtem shibanga ayuba tang chioker, anungji state ka nungi ka aser yimti ka nungi ka ta, tang ya anogo shia nisungtem pei ki bushia meyipa aoba mapang lir. Asen lima nunga town balala nung monga aliba rogotem aika tang ya pei ki bushia aoba asenoki angashir. Ano, asüng yanü bendang tesem balala nungi asen kinungertema arutsü. Parnokji pei alidak temulung lemteta memongtetra arutsüla, kechiyong iba ama mapang tamajung nung pei kija shisabolua alitsüba majung, ibayongji government-ia yariseama parnokji yimti balala nungi anir arutsü. Atangji, parnokji shiranger masü saka yangi temalen shiseama aliba ama tenük agi manguba tashidak mesen den rarar asünungji, shiranga mait tashibo shingaia shinga daka iba tashidak mesen menaloka aliba mereprangtetter. Asenok atema tekümdangtsüji aji ka lir, kechiyong bendanglen nungi arur kati iba tashidak menaloker aru nungbo pai mesüra lai tangar anasemka dak menaloktsütsü aser tangar anasemka jagi ano tangar anasemka dak menaloktsütsü ta khen nung iba tashidak jagi yimti asüngtsü aser idangjibo shiba tama yarir shiba tesü yaritsü ta asüba lendong tia ka nung repranga lia nisung remer merema asütsü. Tang tashi nung iba tasütsü wara tashidak agi atongba limatem nung shiranger anepalurtem aser mesüi kümzükertemi asenok dang iba tasüba wara tashidak nungi kümzüka alitsüba kima yimdong nung nisungtem ajurua mejajatsü, lokti sentepdaki maotsü, temang merükmejua alitsü, talisa teka sapon agi shitokpet shidoktsü, tzü tatsük talem jempet jema alitsü, moko sali machitsü, yi majemtsü, temang tashi itta alitsü atema aonsutsü aser süngjanglijang peria achitsü aser kodamasüba nungdak kar atema kima yimdongi aotsüsa kümra sü agi teni tebang nembanger senzütsü saka tangar den menatepa mejajatsü aser külemi menokdaksü atema tekümdangtsü aser teinyaktsütem agüja lir. Iba denji kima yimdong nung semer senzüba tsüngsem ki telongi bener maitsü aser yimdong nungi arur tzü chigudoktsüba kanga tongtibang ta tajangshir aser temetetertemi asenok ajungshir. Itemji inyaksüba kanga tasakbo masü. Ajisüaka, asenok sobaliba nung asen kija amongba, aoba aser aruba kangabo mali, asen sobaliba tajungtem ajakji lokti adenshiba dak sendaktepa lir, iba jagi asenoki angashiaka mapa kuma mebenshitetter. Ajisüaka, tang yabo asayamenüba mapa ka masü aser coronara virus ya yimra manga masü saka temang nung tango sota ayuba tashidak lir. Iba jagi temetetter aser tajangshirtemi akok tashi pei chirnurtem danga pei tsürabur anasai maotsü ajungshir. Iba ama tekümdangtsü aser teinyaktsü sayubatemi angateta akok tashi bendanglen alirtemi, timtem balaka melira, arutsü memerangtsüla aser arurtemia pei alidak pei taküm dang masü saka külem lisemertem meima mapang tajung ka maru tashibo aremzüka shinga dena majurutepi pei kija lia atatsü merangtsüla. Iba jagi asen nübortem tasütsüba lendong nungi kümzüksü.

OLEMSABANG TAI TASÜNGTANGBATEM KAR

- L. Shilu Jamir, Dimapur

Asenok taküm ya taginuba aser metetnuba, pei tejangrabatem tabu balala agi sunga lir. Aiben asenok taküm nung mapang masütang, tasüngtangba tai asüngtangba ajanga asenoki metetnuba, taginuba aser tejangraba menguteter. Itemji metettsü asoshi mapang shidak nung tasüngtangbatem shidak asüngtangtsüji kanga tongtipang.

11.Timoti. 2:23. "Saka tamaji aser tamashi tasüngtangbai rara adokdaksür ta meteta, itemji tokjang". Asenoki Tsüngrem dang tamashi tasüngtangbatem asüngtangba kar shisadangi. Covid-19 wara ya shirnok asoshi yokba? Yisu dak amangertema iba wara agi atongtsü asü? matongtsü? Yisu dak amangertema iba wara agi asütsü asü? masütsü? Shir menen yong tanu onok kangshidaksür? Ya Tsüngremi temenenpurtem asoshi temerenshi yokba asü? Lokti tekülem sentep magitetba ya Tsüngrem jashir-a asü? Etc. Item tasüngtangba balala agi asenok molung sunga alitsü sudi. Ken ashitsübo asenoki iba ama asüngtangbaji tai mali amai saka iba ama wara mapang nung asenoki tasüngtangbaji asen molung nung tai asüngdangra asenok tetsübuang tali bendenloker asütsü, aser iba ama tai asüngtangbaji ajanga asen taküm, kibong aser lokti nung timtem aser shisabulu ang jenti adoktsü. Anungji iba ama timtem Covid-19 tashidak wara mapang nung asenoki tasüngtangbatemi shidak asüngtangtsü nungdaker. Tita 3:9. " saka tamashi tasüngtangba kidong otsü, bangsentepba, item nungi na pilaang, kechiyong itemi tajangzük maka aser amajok."

Tang ama Corvid-19 wara mapang ya asenok Yisu dak amangertemia tasüngtangbatemi komala ka asüngtangtsüla? Asenok ket nung rongsen lira, "Yisu Nai moatsüba nungi ni kechi mapa ka inyakdaksüner"? ta asüngtangtsüla. Rongsena maka, lockdown ajanga mapa- a kecha meinyakteter, saka iba ama mapang nunga, "Yisu na asoshi Ni kechi inyaktsüla"? ta asüngtangtsüla. Asenokbo tang tashi nung Conavirus agi memenepdaktsüba asoshi, Tsüngrem tenung asangtsüla. Asenok Arogo aser lokti-i timtemer asoshi-a kechi inyaktettsü? Tang ama mapang ya, Tsüngrem sentsüwangshi asoshi nungdakbapurtem dang ni aser ozü kibong/lokti-i kechi inyaktsüla ta asüngtangtsüji tang mapang ya lir. Kechiaser "...Oh tamashi nisung, mapa medeni tamang tapunga ta nai meteter ma"?(Yakob 2:20).

Asenok tasüngtangbatem tai asüba agi asenok jashir saka tasüngtangbatem shidak sura timtem, wara agi menepbaka asenoki koktet-tsü. Tasüngtangba koba nung pangsentepba lir aser tazangzük mali iba nung asenok mapang meindokli kechiaser iba nung shinga tajangzük mali. Filipi 4:8 "...langka tajung lira, aser langka nungsang lira item indang bilemdangang". Covid-19 wara mapang ya asenoki Tsüngrem dang tasüngtangbatemi shidak asüngdangtetra, asenoki memetedi Tsüngrem taochi ajanga asen Kibong, asen lokti aser asen lima anepba-adoktsü.

Kibubai Shimteta Yimsüsürtem

- Lipoksangla Jamir

Kibubai shimtetba akhüm taket asen Naga nung yimsüsürtem,
Asen lima kinük pezüsü len nungi teshimtet atenshiogo.
Ita anü sangwa ama nenok shisa mapa tajung agi,
Timtem mapang ajak nung taküm kümzüktsu jong medem
Nüburtemi nenok dak mulung lemteter.
Oh! Tematiba Tsüngremi maneni shisatsü temürük moajangma.

Alima nübur süneptsütsü aser yimli yangertsü teshimtet lenirtem
Kibubar yimli nenok dak lia nenok mapaji merendakjangni.
Oh! Tsüngremi shimtetba lensanirtem;
Tanü alima aser nüburtem awabanga wazüka yutetsü
Kibubai shisa tabensa apuokjangma.

Anepdang azüngtsü ma mopung tanep sensen medem
Walunir dak aria bilem, tamang katetba sangra
Tenem ma nung sungjen naro pongtet ama,
Oh! Kibuba leniba den sarasadema
Tsüngrem nüsong ma nung tsüngro songa,
Yimden yimli alangtettsü tsüngchi Kibubai moajangma.

Mei mapang ajungben tsüngsak mopung teli tzumok aten medem,
Alijak nung ajungben soitsu makokba leper wara agi (covid-19)
Alima ajak anokshia nübur mulung shimaka alidang
Nübur kümzüktsu meji lenir mapa tajung nung
Tebu Tsüngremi kotaker tesünep tsüngtsüng ola den taneptsü moshia yokangma.
Yimsüsür mapa ajak nung asen lima kümzüktsü asoshi
Tesangra shisatsu moajang ta sarasademtsür.

Amen.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Kentucky nung Tenla kidang tekülem sentong agi tenzükogo



May 11, 2020: Hokolbarnü federal judge anati Tenla kidang adenshia tekülem sentong agitsü atema Arogotem pusema obendang agütsüba sülen Kentucky nung aliba Arogotem nung Tenla kidang tekülem sentong agi tenzükogo.

Ajisüaka tekülem sentong nung loktii aser choir-i ken matentsü.

U.S. District Judges-Gregory Van Tatenhove aser David Hale nati Hokolbarnü Governor, Andy Beshear tetuyuba anema oshidang agüja liasü.

Nicholasville nung Tabernacle Baptist Church-i temepishiba ken o ka agütsü, aser iba dak sendakba ken o angadanga mapang nung Judge, Van Tatenhove-i, state nung Arogotemi sorkar tetuyubatem/telatetbatem shidak benshira Tenla kidang adenshia tekülem sentong agitsü akok, ta metetdaksü.

Van Tatenhove-i, "Tabernacle Baptist Arogoi adenshia tekülem sentong aginer. Khristan ka ama parnoki sadok-sadoka tamangba yimsü dak sendakba benshiner. Ibaji parnok atema nüngdak, aser iba dak sendakba nung parnoki linük temzüng ajanga tekümzüka aginer," ta metetdaksü.

"Ajisüaka executive order ka ajanga governor-i ibaji nokdanga liasü. Pai ibaji inyaksü akok, ajisüaka pai senso ka temeden latetsütsü

asoshi tashi amshiba atemaji kuli tajung alitsüla, kechiyong tamangba yimsü dak sendakba nung pei tangatetba ama inyaksüji America nung er ajak dak temeden lir," ta pai metetdaksü.

"Governor, Beshear tetuyuba ajanga ozüing alema tekülem sentong aser First Amendment alema inyaker," ta Conservative Christian legal nonprofit First Liberty Institute, senior counsel, Roger Byron-i metetdaksü.

Tabernacle Arogoi, "March 22, 2020 nungi tenzüka hopta trok tashi Tabernacle Arogo aser züngsemtem Tenla kidang adenshia tekülem sentong magiteter. Tabernacle Arogoibo online ajanga tekülem sentong agibaji ajanga Tsüngrem sentong mataloktsür amai bilemer, kechiyong Kibubai amangbapurtem longjemer külemdaktsüner," ta ashi.

Iba denji kasa Judge Hale-ia Louisville nung Maryville Baptist Arogo nung amangbapurtem Tenla kidang adenshir tekülem sentong agitsü atema melaogo, ajisüaka Arogo, pastor tem aser züngsemtemi state ketdangsertemi latetja alibatem benshitsu.

Taoba ita Easter Sunday nung Kentucky State Police-i Maryville Arogo nung züngsemtem gari nung mener tekülem sentong agibaji ozüing alema lir, ta notice agüja liasü.

Governor, Beshear-ia shidi

ajanga gari kiburtemji quarantine asütsüla, ta metetdaksüba den külemi sorkar tetuyuba tashi mangaba atema temerenshi agütsütsü, ta amokmerena liasü.

Tan ita U.S. Court of Appeals-ia, Beshear-i adenshir tekülem sentong agiba nokdangbaji bendangshidangba lir, kechiyong pai Laundromats aser yi ayokba stores ama secular nembo temelaba agütsü saka tamangba loktitem nembo temelaba magütsür, ta metetdakja liasü.

Kentucky Attorney General, Daniel Cameron-i, item obendang ajanga tamangba yimsü tsütsü temedentem kümzüka ayur, ta metetdaksü.

Cameron-i, "Ni Arogotem dang kanga sarasadema aser junga shisadanga adenshir tekülem sentong agitsü atema mapang tetemsü shimtsü atema mepishir. Item obendang ajanga Kentucky nung tamangba yimsü tsütsü temeden kümzüka ayur, ajisüaka asen sensotem taküm kümzüka ayutsü atema asenoki asen teinyaksü shilem maneni inyaka kanga kümdanga Tenla kitem tanaben lapoktsüla," ta metetdaksü.

Hokolbarnü state-i tekülem kitem May 20 nungi lapoktsü metetdaksü saka menden ishika dang ayutsüla (building shilem 33) aser tekülem sentong nung loktii ken matentsüla aser choir-ia ken matentsüla, ta metetdakja liasü.



May 9, 2020 nü Edmond, Oklahoma nung Life Church-i tesem kar nung Tenla kitem lapoka tekülem sentong agiba anogo nung Senior Pastor Craig Groeschel-i tekülem sentong ka nung jembiba noksa nung angur. Sarasadema agiba sülen lokti dang sorkar tetuyubatem metetdaksü, iba sülen Life Church-i tekülem sentong tenzüka liasü.

ANOGO ABEN TSÜNGREM DEN

SENSAKER DANG YARIBA TEPEN

"Shibai sensaker dang aria bilemer pai Kibuba nem aputsür, aser pa mapa tajung asoshi pa nem Pai shia agütsütsü." (A. Shin 19:17).

Tangar asoshi asen teka temoatsüba ka asütsü sarasadem ka - kotaker Oba, kü teka lapokjang!

Ne teka teti salaa lir. Pelaa agizükba aser moatsüba teka. Kodang Ne chir kangki nung Pa teka salar asü Nai ibai tabensa jungkai adoktsü.

"Mulungsoa agütsütsü kü teka salajang, Kibuba. Kü teka ajitrepatokra ni koda junga asazüka agütsütsü? (Luke 6:38). Kibuba Yisu O ni teti bilemtetta alitsü kü dang yariang, "Tagizükba dang nungi tagütsüba tali temoatsüba" (T. Mapa 20:35). Nai onok nem Ne chir aser Ne Tanela teti tatem makai agütsü. Nai onok nungi tajung kecha sotta mayur (Rom 8:32). Kü tekai agütsütsü tekara aser agizüktsü milungi südakjang. Kotak nung kü rongsen rizüngjang (Mt. 6:19-20).

"Kibuba, tashi maitertem yaritsü kü teka songlajang. Zükla alir yaritsü asoshi kü teka Hur aser Aaron teka ama lidakjang (Anitet 17:12). Ni kü teka melen tebilemba tagütsüdaktsü. Azüa aliba tzütok ni mesükdangtsü aser mokozi alungba mi meremseptsü (Mt. 12:20).

Timtem nung alir yaritsü kü teka salajang. Tanü alima nung ni Khrista temang züngsem ka ama Pai Pa taka salaba ama kü teka salajang. Sensakertem yaritsü asoshi kü teka kodanga ania tekümdaktsü kechiaser alima sensaker teti alitsü ta nai ashi (Tazüng. 15:10-11). Ni maneni asükdang aser Nai menungnangi agütsür (Yakob 1:5). Süra ni sensaker ken dang nungi tali meshir arutsütsü?

Temeim Oba, ni Ne nem magütsükdang kü tekai kwiben temenen mapa inyak! Ni tang aria bilemba mapa inyakdakjang. Ni kü teka Ne sabang nung yutsür, Na meteni ni kecha inyaksü makok. Kü dang yariang ta ni Yisu tenüng nung sarasadem. Amen.

Laos linük nung Khristantemi maneni reshikangshi tia ajurur

Laos, May 11, 2020: osang ka ajanga metetdaksü. Communist linük- Laos linüki "Khristantembo temeden tamangba yimsü dak sendakba mapatem kümzüka ayutsü aser ajaki pei tamangba yimsü sadoka amangtetsü atema ozüing ka yanglushiogo, ajisüaka Laos nung Khristantemi maneni reshikangshi tia ajurur, ta International Christian Concern osang ajanga metetdaksü.

May 7, 2020 nü Radio Free Asia den jembidang yimdaklir Khristan kati, Laos kübok Luang Prabang province nung tang tashi tamangba yimsü dak sendakba temedentem magütsür aser ketdangsertemi Khristan yimsü ya America nung yimsü ama züngshir, ta metetdaksü.

"Parnoki onok dang, ozü yimtsüng nungbo Khristan Tsüngrem mali, aser ner netsü-nebou nung süng-long tsüngrem külemertem liasü ta ashir," ta paisa metetdaksü.

Ketdangser kati pa dang, "Ajisüaka nenoki America nung Tsüngrem amanger. America nung asenok dak kechi inyakar nenoki mebileteter ma?" ta asükdang. Vietnam war mapang nung America nung Laos nung bomb aika pokdaktsüba dak sendakba nung ketdangseri iba o ya jemb.

Ano Khristan nütsüng aika aliba yimtsüngtembo sorkari senzüka yutsür aser ali tsütsü yimdaklirtem ashioktsür, ta

asang ka ajanga metetdaksü. "Khristantembo temeden mali, aser shingaia parnok mereprangtsü ta parnoki onok dang ashir. Onoki yimdak yimsüsürtem dangi oa jembir, ajisüaka yimsüsürtem jagia Khristantem mereprangner," ta paisa ashi.

Tawa U.S. Commission on International Religious Freedom (USCIRF) report ajanga ashiba agi, Laos nung religious freedom jenjang tajungba kümogo, kechiyong Laos nung ketdangsertemi Khristantem apuba mesüra pua ayuba kanga ajema kümogo. Ajisüaka tang tashi sorkari Khristantem anema maneni inyaker.

Laos nung Ethnic Hmong Khristantemi pei tamangba yimsü medoktsüba ajanga sorkar ketdangsertemi parnok dak melung kangabo malemer. Taküm küm tetenzüklen Luang Namtha province kübok Tine Doi yimdakbo Khristan kibong asem yimdak nungi meindokogo.

March 15, 2020 nü Lao pastor, Sithon Thipavong-i Savannakhet province nung Xonbury district kübok Kalum Vangkhea yimdak tamangba yimsü dak sendakba maparen kar inyakba atema ketdangsertemi apu, aser ita trok tepoukdak ayutsü atema obendang agütsüba sülen tang tepoukdak lir, ajisüaka tang tashi ketdangser shingaia pa apuba kuliji memetetdaksür, ta kasa osang ajanga metetdaksü.

OLONG PAITEP # 5454

1			2			3		4		
					5					
		6								
							7			
		8								
9										10
				11		12				
13										
14						15				

- | | | | |
|--------------------|-------|-------------------------------|-------|
| TIPILEN | | LANGTSÜNGLEN | |
| 1. Chiyungtsü oksa | - (5) | 1. An tetsü | - (5) |
| 3. Tatalokbatem | - (5) | 2. Juzüa senzüba shiruru | - (7) |
| 5. Tama | - (6) | 3. Tamendakdak | - (4) |
| 6. Pei meyong aküm | - (3) | 4. Tiak-asang | - (6) |
| 7. _ _ _ _ bang | - (4) | 7. Tasa | - (7) |
| 8. Kinungpurtem | - (7) | 8. Süngjang telung nung aliba | - (6) |
| 9. Nokdak masü | - (4) | 10. Ibai masü | - (5) |
| 12. _ _ _ la | - (3) | 11. Ano mamen | - (4) |
| 13. Ochi masü | - (6) | | |
| 14. Yagi Sü ataker | - (5) | | |
| 15. Temadok | - (5) | | |

OLONG PAITEP # 5453 TELANGZÜBA

- | | | | |
|---------------------------------------|--|---|--|
| TIPILEN : | | LANGTSÜNGLEN : | |
| 1. Semtu, 3. Lepko, 5. Bilem, 8. Ulu, | | 1. Sayu, 2. Teb, 4. Kimong, 6. Lungkak, | |
| 10. Tsünpang, 11. Tesangwa, | | 7. Milak, 9. Zünga, 10. Temopu, | |
| 13. Aoksa, 15. Putir, 16. Yipru. | | 12. Walu, 14. Ali. | |

CORONA COMMITTEE :

Sobang : Temba kongi apusorba?
Alokba : Ya, taonunga Corona committee meeting jateper, aji-odi no!
Sobang : Waa !!!cjoko iba lokti jia tenteter?
Alokba : Aito, sub-committee alir nung koda!
Sobang : Achha, kechi committeesa lir aji?
Alokba : Jang committee ka, sen-otsü committee ka aser Relief adjustment committee ka ta sa lemsar inyakdarko.
Sobang : Kanga junger, saka ni mangatetba kaji, Relief adjustment committee ta ahabaji kechi?
Alokba : Wa, sorkar nungi arubajito, tekalen nungi ajas süyonga alubaji asen ket atongdangbo apuapua dang atonger, idakjia asen sasep nung "iter-oter" inyaktsüsa akümer ajaa!
Sobang : Oh Corona!!

Lilir : SMS


TANÜBO NAI LANGZÜANG

Q. Koba küm Animal Husbandry Startup Grand Challenge tenzükja liasü?
 A. 2014 B. 2015 C. 2017 D. 2019
 _____ (Taruba adok nung onoki langzüsü)
YASHI ADOK TELANGZÜBA : Plants

Tepela Tasoba Anogo

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :



NAI-A YA METETTER MA?

MAY 12 NÜ ASOR NÜNGTUGU NISUNG KAR:

Rami Malek	Actor
Emilio Estevez	Actor
Katharine Hepburn	Actress
Stephen Baldwin	Actor
George Carlin	Comedian
Florence Nightingale	Founder of Modern Nursing.
Rhea Seehorn	Actress
Tony Hawk	Skateboarder
Emily VanCamp	Actress
Gabriel Byrne	Actor
Ving Rhames	Actor
Dante Gabriel Rossetti	Poet
Gabriel Faure French	Composer & Pianist

SUDOKU # 5496 TELANGZUBA # 5495

						1	5	1	4	2	5	6	3	7	9	8	
				5	8		7	9	9	3	6	8	7	4	1	2	5
6		9							7	5	8	2	1	9	3	4	6
	6	1	5		3	4	9		5	2	7	1	4	8	9	6	3
			6		2				8	1	4	3	9	6	2	5	7
	2	5		4		1		3	3	6	9	7	5	2	4	8	1
2				6	1			8	4	9	3	6	8	7	5	1	2
				7		9		1	2	8	5	4	3	1	6	7	9
3			8		5	2		6	6	7	1	9	2	5	8	3	4

OJANG LUTEP # 5044

- ESHTEMIPUR :
 TENJEMELI :
 ARTIBI :
 KUTTAET :
 SÜMEK :
 KASA :
 PUTNEEMENR :
 BAJBILTEEMI :
 IDATAGK :
 KAMA :

OJANG LUTEP TELANGZÜBA # 5043

**KHEN PELATSÜ ATEMA INYAKDANG NUNGIBO TETI
 PELA ALITSÜ MERANGA INYAKANG**

TAN HOPTA ATEMA - KOMA SÜLA ?

Q. Tashidak nokdangtsü atema taruba June ita tashi Assam nungi jangotsü aser gari totzü abenba garitem kata Nagaland-i matudaktsui nokdang nunga koma süla?



New Delhi, May 11, 2020: Hombarnü New Delhi nung National Technology Day anogomong nung Union Defence Minister, Rajnath Singh-i video conference ajanga Defence Research and Development Organisation (DRDO) nungi scientist tem den jembiba noksa nung angur. Kasa noksa nungsa Department of Defence R&D nung Secretary aser DRDO Chairman, Dr G Satheesh Reddy-a angur.

India nung nisung ajak agi 67,152 dak Covid-19 putetogo

New Delhi, Monupii/May 11 (Agencies): Hombarnü Union Health Ministry-i nüburtem dang nü dak coronavirus tashidak temaitsü alinunga maoksatsüla, ajisüaka mapang shidak nung treatment agitsüla, ta mepishia metetdaksü. Hombarnü tashi nung India nung nisung ajak agi 67,152 dak coronavirus tashidak putetogo, ta Health Ministry-isa metetdaksü. New Delhi nung osangbenertem den jembiba mapang nung Ministry of Health & Family Welfare nung

Joint Secretary, Lav Agarwal-i, "Coronavirus tashidak temaitsü aketertemi mimshia malitsüla, saka kidang nungi ayazüka mapang shidak nung treatment agitsüla," ta ashi. "Asenoki ibaji meinyakra asenok kija shirangba dang masü saka kibong nung züngsem ajak timtemi yoktsü," ta pai ashi. Ketdangserisa, tesüiba ghonda 24 tsüngda linük nung nisung 97 coronavirus tashidak agi süogo aser nisung 4,216 dak iba tashidak putetogo, ta metetdaksü.

Ibaji densemabo tang tashi nung India nung nisung ajak agi 67,152 dak coronavirus tashidak puteter. Tang tashi nung iba tashidak agi nisung 2,206 süogo aser tang teshirangdakpur 44,029 treatment agidar, ta paisa metetdaksü. Agarwal-i, tesüiba ghonda 24 tsüngda nisung 1,159 bo anepadokogo, aser ibaji densemabo ajak agi nisung 20,917 anepogo, anungji linük nung iba tashidak agi shirangertem anepadokba shilemji 31.15 lir, ta metetdaksü.

Passenger train service tenzükba ajanga tashidak proktsü: TMC

Kolkata, May 11 (Agencies): Coronavirus tashidak prokba nokdangtsü atema linük shibangba dak sendakba nung Centre sorkari temeli ana keter jembir, ta Hombarnü Trinamool Congress (TMC)-i BJP-i aniba sorkar sashia aitsüogo. Centre sorkari passenger train services tenzüktsü atema telemtetba agiba atema TMC-i Centre sorkar aitsür. Ibaji langzüka West Bengal state unit BJP-i, Centre sorkar aitsütsü atema TMC dak temeden mali, kechiyong West Bengal nung TMC sorkari coronavirus tashidak anema raraba nung tamakok nguogo, ta aitsü. Amongnü Indian Railways-i, parnoki May 12 nungi passenger train service tenzüktsü, ta sangdonga liasü. March ita nung India linük

shibangba mapang nungi tang tashi passenger train services ajak nokdanga lir ajisüaka Mongolbar nungi train service tenzüktsü. Centre sorkari train service tenzüktsü telemtetba agiba aija TMC MP, Santanu Sen-i, Centre sorkari state tem nung tenokdangba tesashiba benoktsü atema jmbir, ajisüaka ano külenbo parnoki item tenokdangba den meputepba telemtetba agir, ta ashi. "Temeli ana keter o jembiba atema Union sorkari kuli ashitsüla. Passenger train service tenzüktsü atema telemtetba agiba ajanga parnok tashimait sayur," ta TMC lenirisa ashi. Ano state nung minister aser Kolkata Mayor, Firhad Hakim-ia, train service tenzüktsü telemtetba agiba ajanga ano

tashidak taliba proktsü, ta ashi. Hakim-i, "Tang ama tensa ka nung train services tenzükba ajanga tashidak prokba tali akümtsü. Centre sorkari tim masüba telemtetbatem agir. Kechi inyaksü mesüra kechi meinyaksüar parnoki mejangjar," ta ashi. Ano külen state nung coronavirus tashidak anema junga meraraba atema TMC sorkar aija state BJP Tir, Dilip Ghosh-i, ruling party nung lenirtemi item ama o mejembitsüla, kechiyong parnoki tanga state nung oa aayangertem anir maruteter, ta aitsü. "Tangalen oa aayangertem timtem atema state sorkari junga meinyaker. TMC sorkari Bengal nung linük shibangba telatetbatem junga benoka meinyaker," ta BJP lenirisa aitsü.



Bengaluru (Karnataka), May 11, 2020: 'VandeBharat Mission' kübok Hombarnü UK nungi India nung Bengaluru nung aliba airport tonga aruba noksa nung angur.

Railways-i passengers nem tetuyuba agütsür

New Delhi, May 11 (Agencies): Mongolbar (May 12, 2020) nungi linük nung train service tenzüktsü atema Indian Railways-i sangdongba sülen parnoki passenger tem dang teinyaksü aser meinyaksütem tejangja metetdaksüogo. Indian Railways-i Mongolbar nungi air conditioned trains 30 senzü tenzüktsü aser ibaji Rajdhani Express service den kasa asütsü. Hombarnep Ministry of Home Affairs (MHA)-ia train nung nüburtem senzütsü atema standard operating procedure (SOP) metetdaksüba den külemi coronavirus tashidak temaitsü malirtem aser ticket tejangja alirtem ang train station telungi aitsü aser train nung senzütsü atema melatsü, ta metetdakja liasü. Item special trains nungji AC classes dang alitsü. Passengers atema tetuyubatem/metetetsütem: Thermal screening agitsü atema Passenger ajak minute

90 jelia train station atongtsüla. Passenger ajaki Aarogya Setu app download süa amshitsüla. Passenger ajaki pei meyong blankets abentsüla aser chiyungtsü den tzü bener arutsüla, kechiyong train nung catering services malitsü. Railways-i sen yong chiyungtsü tilateri den tajemtsü tzü agütsütsü. Advance reservation period ji timtiba agi anogo 7 asütsü; RAC malitsü, waiting list ticket aser train nung booking memelatsü. e-ticket malirtem railway station telungi maitdaksütsü. Passenger temi railway station aser train naprongla nung mask agitsüla; station aser coaches nung passenger ajak nem hand sanitiser agütsütsü. Journey tembangba sülen state aser Union territories-i lateta aliba inyakyim ajak nung passenger temi amaliteptsüla. Train-i ayaketa atudang aser aludang passenger ajaki social distancing benshitsüla.



Thiruvananthapuram (Kerala), May 11, 2020: Coronavirus tashidak nokdangtsü atema linük shibangba ajanga Kerala nung aika linük tesem balala nungi maruteti aliba anema Hombarnü Kerala yimtiba, Thiruvananthapuram nung Youth Congress nung inyakertermi Cabinet rank nung sorkar ketdangser, A Sampath'er kidangi longkak aita aoba noksa nung angur.

TN CM-i PM Modi dang state nung train service memelatsü mepishia

Chennai (Tamil Nadu), May 11 (Agencies): Tamil Nadu nung coronavirus tashidak agi shiranger jenti aliba nung ajemdaker Hombarnü Tamil Nadu Chief Minister, Edappadi K Palaniswami-i Ato kilonser, Narendra Modi dang May 31, 2020 tashi state nung tayimtsü aser train services memelatsü mepishia liasü. Linük nung coronavirus tashidak anema raraba dak sendakba nung Ato kilonser, Modi-i Chief Minister tem den video conference senden ka ayongzüka liasü, aser iba senden nung jembidang Tamil Nadu chief minister-i, "May 31 tashi tayimtsü service metenzüktsü ni nü dang mepishir. May 12 nü Chennai tashi train service aser Chennai nungi train service tenzüktsü, ta onoki press osang ajanga metet. Chennai nung iba tashidak timba-timba kümdar, anungji May 31 tashibo ozü state nung train service memelatsüla," ta ashi. Palaniswami-isa, par sorkari treatment atema arurtem aser tangalen nungi arua aayanger 13,284 tashi train 12 nung pepei

state-i yokogo, ta metetdaksü. Paisa, May 11 nungi May 17 tashi nung tangalen nungi arua aayanger den tangartem train 61 nung yoktsü atema sorkari sentong yanglua lir, aser ibaji tanga state tem den jembiteper ang yoktsü, ta metetdaksü. "Ni chief minister tem dang tekaraba nung osang yokang ta mepishir," ta paisa shisem. Vande Bharat mission aser Samudra Setu mission kübok tayimtsü pezü aser rong ka nung bendang linük balala nungi sensotem Tamil Nadu tonga aruogo. Tang item passenger 900 shi institution balala nung quarantine südar aser standard operating procedures (SOP) inyakyim kübok parnok dak iba tashidak tendangdar. Tesüiba ghonda 24 nung Tamil Nadu nung nisung 798 dak coronavirus tashidak putetogo, aser ibaji densemabo state nung ajak agi nisung 8,002 dak iba tashidak puteter. Tamil Nadu nung iba tashidak agi nisung ajak agi 53 süogo, tang teshirangdakpur 5,895 lir aser nisung 2,051 bo anepadokogo.



Indonesia indang North Sumatra province kübok Port of Belawan nung aliba Waruna Shipyard nung totzü tazü bena aliba rong tuluka May 11, 2020 nü raksar mi adoka aliba mapang tangokba noksa nung angur. Port of Belawan nung rong anendak, Waruna Shipyard nung anena aliba crude oil tanker ka nung Hombarnep mi adoka iba lendong nung nisung tenet yirua liasü.

Nigeria nung yimtsüng ishika amak; nisung 20 tepset

Abuja, Monupii/May 11 (Agencies): Nigeria anüolen yimtsüng kar nung mejangjaba nisungtemi amakba lendong nung nisung tajemba agi 20 asü, ta item tesemtem nung aliba ketdangsertemi ashi.

Tillaberi region indang governor, Ibrahim Tijani Katchella-i Deobarnü national radio dang ashiba agi, lendong agütsürtem ya motorcycle tem nung aru aser dokang nunga auyar north tsütsüi jena ao. Pai iba dak tali tejangjaba mashi.

Iba lendong ya Gadabo, Zibane Koira-Zeno aser Zibane-Tegui yimtsüngtem nung atalok, ta yangji aliba osang ka ajanga ashi.

Item yimtsüng ajunga ya Anzourou, ajanga ketdangser,

koba Niger, Burkina Faso aser Mali arrtsü anasa aliba Tillaberi yimti nungi kilometer 50 shi pilar lir, kong al-Qaeda aser ISIL (ISIS) telungpur den sendaktepa alirtem tashi ita aliba ajanga Sahel tesem tuluka nung sorkari yimsü mesüteter.

Iba region nung France-i aniba Operation Barkhane, United Nations sepai aser G5 Sahel sepaitemi densema sepai telok aika kümaka tensa tamajungba akümer.

Taoba küm January ita iba region nung aliba telungpurtem aziüoktsü mechi Nigeria sorkari motorcycle tem mejajadaksü aser chiyongtsü ayokba tesem aika shibangdaksü, kechiaser item tesemtem ajanga

kiralongrar nem totzü aser chiyongtsü agütsür, ta governor-i ashi.

Iba region nung küm asem tejakdang sorkari benokba state of emergency ano maneni tawa atsülangshiogo.

Coronavirus tashidak wara dak ajemdaker Sahel nung telungpurtemi lendong agütsüba tali kümogo, ta UN Secretary-General Antonio Guterres-i taoba hopta shia liasü.

Telungpur telok balala den raraba sepaitem dang amalitep tali akatsü atema UN tekolakbai ajungshi.

"Sub-region nung lendong tali agütsütsü atema kiralongrar temi COVID-19 tashidak wara tensa nung tajangzük bushir," ta Guterres-i ashi.

Hong Kong nung democracy busema longkak ait tenzükshir

Hong Kong, Monupii/May 11 (Agencies): Hong Kong ketdangsertemi democracy busema longkak aiter nisung 200 dak tema apu, ta Hombarnep sangdong ka ajanga ashi, kong parnoki mezüngbo shopping mall ka nung ken dena longkak aittsü adenshi, saka China-i yimsü asüba yimti yimdong sünga prokshia ao.

Deobarnü longkak aitertem senshidaktsütsü mechi riot police noklang aika yoka liasü, kong osangbener kar rarabangsenba tiyong nung mejepoka taoba küm mepetmesü adokba bilemteta liasü.

Iba mapang nisung 200 dak tema apu ta ashir, saka police temibo tejangja meshitet. Nisung 18 mozüki-i bener aru, ta Hospital Authority ajanga ashi.

Mapa inyaker timba aliba Mong Kok district nungi noksa sayuba nung riot police temi osangbener tem nungdokba aser longkak aiter dak pepper

spray khaloktsüba nguogo. Video kar nungbo longkak aitertem ali nung nenketa ayuba, tebang o agi raratepba aser kar dak azü ayimba nguogo.

Police temi osangbener aser longkak aiter dak pepper spray khaloktsü aser parnokisa nüburtem aser osangbenertem anendakba temang mita reprang.

Hong Kong Journalists' Association (HKJA) ajanga ashiba agi, par züngsem karbo iba tatalokba metangokdaksü.

"Pepper spray khaloktsür aliba osangbener karbo temang anepalu mesüdaktsü aser video metangoktsü ashi," ta HKJA mendenpuba, Chris Yeung-i ashi. Iba dak sendakba nung police temi telangzüba kecha magütsü.

Coronavirus tashidak wara poktetba aser iba tashidak aziüoktsü asoshi ozüng tesashi benokba ajanga taküm sorkar anema longkak aitba azüng-azünga liasü, saka tawa

democracy busemertem apuba aser Beijing-i iba yimti tesashiba nung amokbangba ajanga longkak aitba tenzükshir.

Riot gear agir ailiba police temi longkak aitertem dang parnok ozüng alema adenshir aser virus anema benoka aliba ozüng nung aibelener ta ashi, kong nisung ti dak tema adenshitsu memelar.

Nüburtemi amshiba tesem nung tim masüba yimya amshiba mechi Democratic Party nungi ozüng yanglur Roy Kwong apu, ta police temi ashi.

Video footage nung Kwong ya police temi muketbanger ali nung nenketa ayu. Saka pa temang majung akümba sülen mozü kidangi anir ao.

Taruba ita iba yimti nung longkak aittsü renemshir, kong activist temi July 1 nü nisung million ana adenshia yimtung jung jajatsü ayongzük. British nungeri July 1, 1997 nung iba yimti ya China nunger yimsüsür küboki aitdakja liasü.

Iran tzüyim sepaitem training agidang lendong ajurua nisung 19 asü

Tehran, Monupii/May 11 (Agencies): Gulf of Oman nung exercise agidak shilem agiba tzüyim sepaitem indang rong ka nung missile kati khashia rong anir 19 asü aser 15 yiru, ta Iran mitkartemi ashi.

Deobarnü atalokba lendong indang sangdong Hombarnep agütsüba nung asürtem aika kümer liasü.

Aji masüdag Iranian state media ajanga ashiba agi, deobarnü exercise agiba mapang Hendijan-class teyari agütsüba rong, Konarak ya target anasa liasü. Danga rongtem target atema iba rong yagi anepalua liasü. Missile yagi aibelena iba rong nung khashi, ta ashir.

Gulf of Oman nung training exercise agiba mapang Iranian missile khaloktsüba agi target anasa teyari agütsüba rong ka nung khashia rong anir ka asü aser 15 yiru, ta Iranian media ajanga Hombarnep sangdong.

Deobarnü iba lendong ya Jask rong anendak atalok, koba Gulf of Oman nung Tehran nungi lilometer 1,270 shi pilar lir,

ta state TV ajanga ashi. Missile yagi Konarak, Hendijan-class teyari agütsüba rong nung kongshi, koba exercise nung shilem agia liasü.

State television ajanga, iba missile khaloktsüba ya asaa masü aser Konarak ya target anasai tali orr liasü, ta ahi.

Iba tesem nung aliba mozüki ka nung rong anir 12 anepaludar aser ano tera yirur alir asem anepalur yokogo, ta sorkar meyong IRNA news agency ajanga ashi.

Konarak ya 2018 küm yanglushi aser iba rong yagi tzüyim aser rong raksatsüba missile tem khaloktsüteta liasü. Dutch nungeri yangliba meter 47 (feet 155) talang rong ya 1988 nungi amshia arua liasü aser iba rong tuozük ton 40 lir. Teti iba rong anir 20 shi bener jajar.

Iran-i iba region nung teti exercise agir, koba Strait of Hormuz anasa lir. Strait of Hormuz ya Persian Gulf nung lir aser iba tesem ya ajanga aliba nung amshiba totzü shilem 20 ajanga aor.



Beijing, Monupii/May 11 : China yimtiba, Beijing nung aliba Peking University People's Hospital nung tasen shima aliba nurse temi tezüngzüktep agiba noksa ka yangi angur. China Tir Xi Jinping, shiba Communist Party of China Central Committee nung tongti zülur aser Central Military Commission nung mendenpuba lir, pai May 12 nü International Nurse Day amungtsü lia nurse tem den salem lemsatapa liasü.

COVID-19: Italy aser Britain dang Russia temaba nung lir

Moscow, Monupii/May 11 (Agencies): Italy aser Britain linük nung coronavirus tashidak puteta aliba dang nungi Russia nung timba kuma Hombarnep iba linük ya alima nung COVID-19 tashidak timtiba aliba linük rongnung jenjang asemubaba nung lir.

Ketdangsertemi Russia nung iba tashidak ya nisung 221,344 dak puteta lir ta sangdongba ajanga Italy mesüra Britain dang timba lir aser iba linük dang timbaji Spain aser United States nung dang lir. Russia nung tesüiba ghonda 24 tsüngda nisung 11,656 dak novel coronavirus puteta liasü.

Russia nunger iba tashidak putetba mesüra asüba ya tesadang ka Moscow nungi lir, koba Russia asoshi tamajungtiba tesem alitsü. Iba yimti nung

manger sangwadang nisung tasen 6,169 dak puteta ajak senteper nisung 115,909 aküm.

Iba linük indang coronavirus response centre-i ashiba agi, kasa mapang nisung 94 süa tang linük nung iba tashidak agi asür ajak agi 2,009 lir. Ketdangsertemi iba tashidak agi asüba osang sangdongba ya danga linük aika dak nungi kanga agi tajemba lir.

Iba tashidak kanga sashia tendanga ajanga COVID-19 aliba jangjateter ya aoksa timba aküm, ta Russia ketdangsertemi ashi. Iba linük nung nisung million 5.6 dak iba tashidak tendangogo, ta parnokki ashir.

Hombar nikongdang Russia Tir Vladimir Putin-i senden ka mena linük nung anempongba maparen asadangtsü lir, koba March ita tatemlen benoka liasü.

Opportunity for Scheduled Castes (SC) & Backward Classes (BC) Entrepreneurs to avail Concessional Finance



Venture Capital Fund for Scheduled Castes (SC)/Backward Classes (BC)

A first of its kind Venture Capital Fund dedicated to promote entrepreneurship amongst SC and BC entrepreneurs by providing concessional finance

Venture Capital Fund for Scheduled Castes & Venture Capital Fund for Backward Classes

- Manufacturing, Services and Allied Sectors including Startups with long tenure upto 8 years.
- Assistance of ₹ 20 lakh to ₹ 15 crore for SC Entrepreneurs and ₹ 20 lakh to ₹ 5 crore for BC Entrepreneurs.
- Attractive rate @8% p.a. (For women/divyang SC/BC entrepreneurs - @ 7.75% p.a.).

For Details Kindly Contact: Investment Manager

IFCI VENTURE CAPITAL FUNDS LIMITED

16th Floor, IFCI Tower, 61 Nehru Place, New Delhi-110019

Tel.: 9971137382, 9953450369, 9910113295, 8882853533, 9810793683, 9999154278, 9560263908, 9871071077

Email: funds@ifciventure.com, fundsbc@ifciventure.com Website: www.vfsc.in www.ifciventure.com

Apply Online:

SC Entrepreneurs through website: www.vfsc.in

BC Entrepreneurs through

Email: fundsbc@ifciventure.com

Last Date for Application
30th June 2020



Department of Social Justice & Empowerment
Ministry of Social Justice & Empowerment
Government of India

(www.socialjustice.nic.in, www.pmindia.gov.in, www.mygov.nic.in)

(*Terms & Conditions Apply)



Kohima nungi nisung 3661 pei talidaki yokogo

Kohima, Monupii/May 11, 2020 (TYO): State telungtet nung pei pei talidaki moteti alirtem senzusembongtsü asoshi sorkar ajanga melaba/lapoktsür sülen anogo pungobuba - Hombarnü (11.05.2020), Kohima nungi district balalai aotsü atema pei pei talidaki moteti alir nisung 956 shi bus 33

nung ayamesoa ogo, ta sangdong ka ajanga metetdaksü.

Bus 33 rongnung, bus 13 Mon District, bus 11 Tuensang District aser bus 9 Kiphire District temi ayamesoa ao.

Tang tashi, Kohima District Administration-i anogo pungo tsüngda nung, pei pei talidaki

moteti alirtem parnok nisung 3661 shi anepalua aser achayanga pei pei talidaki district aser state balalai yokogo. Iba den külemi Kohima nungi tanga district aser kidanger state temi passenger tem yoktsü atema, KDA-i bus ajak agi 125 anepalua yokogo, ta kasa sangdong ajanga metetdaksü.

Perenjila nung ki ka arong Lekhapani nung nisung ka tepset

Peren, Monupii/May 11, 2020 (TYO): Honibar aonung, Peren jila kübok Kipeuzang Colony nung alir Cikap'er ki, shiba shishilembar ka lir, par ki ajunga rongdoka liasü, ta sangdong ajanga metetdaksü.

Iba lendong ya aonung 6:00 ako meta atalok, kong ki kibur yagi par joka nung mi apua yutsür kidang nungi ayazüka orr liasü.

Par kidang nungi mi adokba ngua kidangertem aoksatepa aser ansatepa aliba ki nung nung mi ya mekongshidaktsütsü atema kiyonger ajak adenshia mi remseptsü merang. Iba mapang kilung nung aliba gas cylinder ka apok, saka iba lendong nung shinga meyiru, ta kasa sangdong ajanga metetdaksü.



Tinsukia, Monupii/May 11, 2020: Lekhapani, Tinsukia District kübok Tipping tesem nung Gokul Kachari tepsetsang Raj Karkik yangi noksa nung angur.

Margherita, Monupii/May 11, 2020 (Agencies): Gokul Kachari tepsetba dak sendakba nung osangtem merokmi ama prokshiba sülen, Hombarnü anepdang Tinsukia District, Assam nung Lekhapani indang

Tipping tesem nung alir nüburtem tsüngda kanga dang ain adoka liasü.

Police sangdong ajanga angazükba agi, Deobar aonung Gokul Kachari ya Raj Karkik-i tepset.

"Deobar aonung Raj Karkik ya yi agi meseper Gokul'er kidang oa pa (Gokul) den tebang agi kanga sashia raratep. Iba mapang Karkik-i Gokul dak hadir techira kati tasü küma lepset," ta Police-i ashi.

"Gokul tepseta yutsüba sülen, Gokul kinungtsü dak Karkik-i shi nung medemtsü merang," ta Police-i shisem.

Gokul tepsetba osang angazükba sülen, Lekhapani Police-i Gokul'er ki tonga aru aser Karkik apu. Iba maparen dak sendakba nung police-i bushisüngdangdar.

Maneni, Tipping tesem nung alir lisopurtemi pua alisang Karkik anema temerenshi tulu agütsütsü asoshi takhangba agütsüogo.



Dimapur, Monupii/May 11, 2020: Hombarnü, Moatoshi Longkumer-i 2 Dimapur II AC nung timtema alir kibongtem nem jang-o-tzü lema agütsütsü asoshi renemba mapang tangokba noksa ka yangi angur. MLA Moatoshi-i pa indang constituency atema agütsüba relief teyari ya tanabuba shilem asütsü aser taoba mapang mezüng shilem nung matar/mangur tem iba shilem nung agütsüogo.

TEPELA LEMSATEPER

Temeim Ojala Tiamongla (Changdang) la shiranga aliba nungi la asüba anogo 22nd April 2020 tashi kija kibong aser lokti kwikati ozü den nübo, rongsen aser tamang sarasadem agi yaritepogo nenok ajak dang temulung taroktiba nungi tepela lemsateper. Dang ama tensa nung nenok mapa tajung ozü dak malangba inyakogo, tematiba Tsüngremi nenok ajak moajang ta ozü sarasadem. ~ *Chimur aser Kinungertem.*



WAMEKEN VILLAGE COUNCIL Pelaba Sangdonger

Covid-19 tashidak wara anempong mapang Yimer timtem reprangteta senso kibong., Shri. L. WAPANG JR. (Administrator, Star Cement Ltd, East Jantia hills, MEGHALAYA) ajanga ozü yimdak kibong shia JANG (Rice) lema agütsüba asoshi, PUTU MENDEN aser yimer kibong ajaki kanga pelaba lemsateper.

Tsüngremi par kibong jentipur asoshi maneni moajangma.

Sd/-

**K Meren Ltr,
Chairman. WVC.**



Mokokchung, Monupii/May 11, 2020: Tetsütem anogomung (May 10, 2020) nungtem nung Mokokchung Deputy Commissioner, Limawapang Jamir-i ki asem semdanga sempettem agütsüba mapang agiba noksa ka yangi angur. "Beti Bachao Beti Padao" kübok Mokokchung District Administration-i sentong ka ayongzük aser iba mapang tetsü aser amitsür 250 nem chiyongtsü aser danga osettem sempet agüja liasü.

Zunheboto Task Force-i metetdaksür

Zunheboto, Monupii/May 11, 2020 (TYO): Hombarnü Deputy Commissioner' er kidang Zunheboto District Task Force den külemi Sümi Hoho, Sümi Kükami Hoho, Sümi Totomi Hoho aser ZCMC züngsemtem senden ka agia liasü.

Medical Department ajanga agütsüba tetuyuba nung anidaka, Nagaland state adena orr tanga tesem nungi pei pei talidaki maruteti alirtem, shirnok Zunheboto district-i arutsü lir, parnok rongnung temulung meleme bilemba COVID-19 wara temaitsü alirtem Quarantine Facility centre nung ayutsü aser tanüngba temji pei pei kidang quarantine südaktsütsü, ta senden nung telok ajaki telemtetba agi.

Iba den bendenloksema, Zunheboto district nung Deobar anogo dak alaka, tanga anogotem nung anepdang 7:00 ako nungi nikongdang 2:00 ako tashi dokantem lapokdaksütsü, ta senden nungsa District Task Force-i lemtetogo.

Iba senden nungsa Force-i lemtetogo.

Hertha Berlin nung Jens Lehmann-i Klinsmann melenogo



Jens Lehmann (File Photo)

Monupii/May 11, 2020 (Agencies): Hertha Berlin club indang supervisory board nung Jürgen Klinsmann melena taoba Germany goalkeeper Jens Lehmann shimogo.

Deobarnü sporting consultant ama Lehmann shimba anogo Hertha puri supervisory board atema hiring agent Marc Kossicke shimogo. Kossicke indang clients tem rongnung Liverpool manager Jürgen Klopp aser Leipzig coach Julian Nagelsmann densema lir.

February ita Hertha coach mapa toktsüba sülen Klinsmann-i board nung maneni inyaknua liasü. Investor Lars Windhorst, shibai taoba küm club atema USD million 250 indokogo, pai ashiba agi, taoba Germany aser United States coach-i club ajungbena

toktsüba ajanga tena tsüingda temulunglemtep raksatok.

Lehmann shimba ajanga takok tajungba nguyonga aotsü Windhorst-i imlar. Taoba mapang Borussia Dortmund aser Arsenal goalkeeper, shibai Bundesliga nung asaya 394 aser Premier League nung asaya 148 nung asayaogo, pa pundit ka ama inyaka liasü.

"Hertha Berlin maneni renloka aotsü asoshi teyari agütsütsü atema Lars Windhorst-i maongka agütsüba ni pelashishia agizükogo," ta arishi küm 50 tain Lehmann-i ashi. "Soccer nung iba project ya jangrademtsü aketba mapa rongnung ka ta ni züngshir."

Windhorst-i pa shimba mapang Klinsmann-ia, European soccer nung Hertha nung inyaktüba ya jangrademtsü

aketba mapa rongnung ka lir ta shia liasü. Club nung shilem 49.9 Windhorst meyong lir aser ibayongji supervisory board nung nisung ana shimtsü asoshi pa temeden lir.

Hertha pur iba season mengujemi aliba timtem agika ajangshia aruogo. Season tetenzüki Ante Covic lenisüba kübok asaya tenzük aser iba sülen November 27 nü Klinsmann-i pa mapa belenzük. Club nung tashi tuluba agütsüba sülen Klinsmann-i coach mapa toktsü. Iba sülen Alexander Nouri kübok team asaya pezü tashi kanga timtema asaya aser April 9 nü pa melen Bruno Labbadia coach pezübuba aküm.

Labbadia lenisüba kübok tang tashi nung asaya ka danga asayaa mali. Coronavirus tashidak pokteta prokshiba ajanga Bundesliga March 13 nungi tang tashi masayai lir. Iba asayamung ya Honibarnü nungi tenzüksü renema lir aser Hertha pur Hoffenheim den asayatsü.

Deobarnü team hotel kati ogo aser parnok anogoshi training agitsü asoshi bus kati anir aoer. Asaya metenzük tsüingda news conference ya Brehostibarnü video-link media appointments agi melentsü.

Sports Ministry-i NSFs 54 agizükogo

New Delhi, Monupii/May 11 (Agencies): Sports Ministry-i Hombarnü taküm September ita tashi atema national federations 54 agizükogo, ajisüaka Paralympics achaayangba telok aser rowing, iba list nung maneni mezüngoksem.

Ministry-i the All India Carrom Federation agizükogo.

Paralympic Committee of India (PCI), Rowing Federation of India (RFI) aser School Games Federation of India (SGFI) nung maneni magizük.

PCI aser RFI na National Sports Code nung aibelenba atema khen atema anenja lir aser kasa mapang nung Sushil Kumar-i aniba SGFI telok ya inyakyim meshidakba atema de-recognize süogo.

Yimya agi NSFs tem küm

ka atema agizüker saka takümbo ministry-i September ita tashi dang temelaba agütsütsü asoshi telemtetba agiogo aser iba ajanga Indian Olympic Association (IOA) tir Narinder Batra-i ken o ashishio.

"Kechiba December 2020 tashi masü September 2020 tashi dang," ta Batra-i asüingdang.

Ajisüaka Sports ministry ketdangsertemi iba jenjang kechiba agi iba indang osang tejangja magütsü.

NSFs tilatem atema Ministry-i agizükubaji kanga tongtibang lir kechiyong parnok anogoshi inyaksangshi ajak achaayangtsü asoshi sorkari senotsü teyari agütsüba dak metaloker alir.

China-i Online Nations Cup kokogo

Chennai, Monupii/May 11 (Agencies): Deobarnü top-seed China team-i FIDE Chess.com Online Nations Cup kokogo. Final asaya nung USA den 2-2 nung tembang saka points tally parnok timba asüba ajanga parnoki iba tetoktepba kokogo.

India team nung Viswanathan Anand, Vidit S Gujrathi, P Harikrishna, B Adhiban, Koneru Humpy aser D Harika nung ajak liasü saka team trok asayaba asayamung nung parnok jenjang pongububa nung tembang.

China-i round-robin stage akokba dak ajemdaker iba tetoktepba akok. No.1 seed team-i round 10 asayaba sülen match point 17 aser board points 25.5 ngutet aser parnok sülen USA liasü, parnoki MP 13 aser

BP 22 angu.

Final asaya nung Ding Liren (Elo 2836) aser Hikaru Nakamura (Elo 2829) na asaya move 38 buba nung asaya draw nung tembang. Hou Yifan aser Irina Krush na asayaa draw nung tembanga liasü.

China team asoshi Yu Yangyi-i takok angu, shibai asayamung peyong kanga junga asayaa arur Wesley So dena akok.

America nung asayar Fabiano Caruana-i pa kechiba nungtugu, aji sayua move 43 buba nung Wei Yi akok. Asayamung tepeyong nung China team double round-robin league nung USA den dang Honibarnü round 10 buba aser tatembangbuba nung tamakok ngua liasü.

Dutee Chand-i chiyongtsü talep 1000 lemstsü

New Delhi, Monupii/May 11 (Agencies): Coronavirus den raraba mapang teyari agüja nungtugu asemteper Dutee Chand-i Bhubaneswar nungi km 70 shi orr lar yimtsüing nung chiyongtsü lemstsüogo.

Dutee-i state yimtiba nung ketdangsertem ket nungi temelaba meshi aser Anand Mahindra-i la nem 2016 küm tenla agütsüba la indang Mahindra XUV bener Odisha, Jajpur district kübok lar yimtsüing Chaka Goopalpur-i oa liasü.

"Linük mokdanga ayuba ajanga ozü yimtsüing nung alirtem dak kanga mejungi kongshio aser ni tilaka dang süaka ni akokba tashi teyari agütsünua liasü. Anungji ni temelaba meshi aser ozü yimtsüing Hokolbarnü tonga ao. Ni nisung 1000 shi nem chiyongtsü talep lemstsüogo," ta Dutee-i Bhubaneswar tonga aruba sülen PTI dang ashi.

"Ozü kibong aser ni yimdaklirtem dang ni yimtsüing semdangtsüba osang agütsü. Nüburtem ozü kidangi aru aser ni chiyongtsü lema agütsü," ta lai ashi.

Arishi küm 24 tain Dutee ya tang Kalinga Institute of Industrial Technology (KIIT), Bhubaneswar nung Business Administration degree agidar.

Iba tesem nung athletics track ya la tenüing nung jatsüogo.

"Ni tanaben ozü yimtsüing meyipa orr chiyongtsü lemstsü



sentong lir. Yimtsüing nung nisung 5000 shi lir aser taruba nungbo ni chiyongtsü talep 2000 bener aotsü," ta lai ashi.

"Ni KIIT ngutetsang (aser BJD Member of Parliament) Achyuta Samanta dang teyari meshi. Ni kü sen 50,000 shi indok aser tanungba sen pai achaayangba agütsü," ta laisa ashi.

Dutee ano tang tashi Tokyo Olympics atema qualify mesüi lir aser qualification inyakyim ajak taküm küm tatem tashi magi-i atatsü asoshi World Athletics-i telemtetba agiogo.

La March ita Olympics atema qualify asütsü asoshi merangdangtsü atema Patiala nung Indian Grand Prix Series nung shilem agitsü ao, ajisüaka tensa majungba ajanga asayamung athi.

Maneni lai ashiba agi, lar yimtsüing nung alirtem menerem jakden anguba aser lai teyari tilaka agütsütetba tepela agi Olympic atema qualify asütsü asoshi minperonga aliba

süingjemdaksüogo.

"Olympic atema tang tashi nungbo qualify sür ali tajungba; iba inyakyim ya temela masü. Ajisüaka item menerem jakden angudang ni pelar. Olympics nung medal ka koktetsü asoshi yimtsüing nung yimtsü yimbu temi kü nem temoatsü agütsü.

"Inyakyim ya sen dak sendaka mali saka lokti aser ni soa inetba yimtsüing nem langka meyipa agütsütetba atema ni temulung asür. Kü inyakyim agi ozü tsürapura kanga pelar," ta lai ashi.

Athletics Federation of India-i September ita nung season tenzüksü sentong yangludlar aser Dutee-i ashiba agi, mezüngbuba maongka nung lai shilem agitsü. Ajisüaka taküm national event ya Olympic qualifiers masütsü.

"Ni KIIT campus nung lir aser campus nung track lir anungji ni iba track amshidar, saka ni asayamung ka nung shilem agitsüba mapang training agiba amabo magi-i tajemba agidar.

"Asayamung nung shilem agitsü asoshi mali saka ni temang anema ataner aser kodang asayatsü südir iba mapang renema liner. Iba ajanga kü nem teyari agütsütsü kechiyong tetoktepba ka asoshi ni tetenzük nungi training agitsü asoshi nungdak madoktsü," ta Dutee-i ashi.

Man City kiburi Lommel SK alizükogo

Monupii/May 11, 2020 (Agencies): Premier League champions Manchester City kiburi Belgian second division club Lommel SK alizüktsü mulungtepogo, ta City Football Group (CFG)-i Hombarnü sangdong ka ajanga metetdaksü.

Iba Belgian team ya CFG network nung club tekububa akümstsü, kong Major League Soccer (MLS) club New York City aser Spanish second division club Girona densema lir.

Tenangzüktepba kübok CFG puri Lommel indang sentsüh pound million 1.75 aotsütsü, ta BBC sangdong ka ajanga metetdaksü.

"Iba club aliba ya football kanga sapua asayaba linüktem nung onok shilem agitsü asoshi

nükla yur inyaksangshiba nung shilem ka lir," ta City Football Group indang chief executive, Ferran Soriano-i ashi.

"Lommel inyaksangshi, training facilities aser lanurtem ajungkettsü asoshi rangloker inyakba ajanga onok pua aser parnok inyakyim ajanga onok angazüktsü aser ita aser kümtem tsüingda club renloka aoba nung teyari agütsütsü yongyaa atar," ta paisa ashi.

Taoba küm CFG pur inyakyim atsülangshia Indian Super League (ISL) club Mumbai City FC indang shilem 65 parnoki alizük.

COVID-19 tashidak prokshia aoba ajanga Belgium nung asayamung manendaksü tsüingda Lommel pur league nung jenjang trokbuba nung liasü.

BILEMDANGANG

"Matumalem mapaji azümesena kazüba dang taoba."